

十五家年譜公書

一
函十六冊函

據集譜增訂

王文成公年譜

明王文成公年譜序

錢緒山作文成年譜與羅念菴諸公往復商榷蓋已無恨今第節鈔之去其稍繁者而已亦略有補入者然不多也明史傳贊謂終明之世文臣用兵制勝未有如守仁者而引胡世甯言病其多講學吾謂講學何病門下傑士出爲世用者甚多中間如龍溪諸公放言畸行誠有不免然末流之弊非本源然也且亦止在下位傾動眾人尙不至如邵門之章惇程門之邢恕朱門之胡紘趨炎熱而併忘其師甚或列於奸臣傳焉與其進不與其退設科自古如此毋爲苛論張武承輩趨時局作王學質疑國初競以斥王學爲事
湯文正所謂趨時局者將陽明所說大義微言一概埋沒單摘無善無惡諸語作話頭以爲大疵如

深仇積恨煅煉不遺餘力嗟乎何必如此自謂衛道不知斯道尙非公輩口耳之學所能衛況又出於私意千百年後陽明自在武承輩煨燼矣虛談之與實用固霄壤判也吾於年譜凡陽明時時提掇良知宗旨及論古本大學之類皆不多綴明道不在此也傳習錄之粹者節要附後而於經理南贛兩廣與平逆藩之事功則不憚詳其區畫措置之方以見術有實用者公其最云近人鮑詹事桂星詠史至陽明云莫效蚍蜉撼高樹幾人施手正乾坤蓋有慨乎其言之

光緒丁丑嘉平月朔江右新城楊希閔書於臺陽海東書院

明王文成公年譜節鈔卷一

餘姚錢德洪緒山原本 江右新城楊希閔鐵傭鈔
明憲宗成化八年壬辰九月三十日公生

公王氏名守仁字伯安餘姚人祖天敘號竹軒封翰林院修撰贈嘉義大夫禮部右侍郎進贈新建伯父華字德輝號實菴晚稱海日翁嘗讀書龍泉山中又稱爲龍山公成化辛丑進士及第第一人仕至南京吏部尙書進封新建伯龍山公嘗思山陰山水佳麗又爲先世故居復徙越城之光相坊居之成化八年壬辰九月三十日太夫人鄭娠十四月祖母岑夢神人衣緋玉雲中鼓吹送兒授岑岑驚已聞啼聲祖竹軒公異之卽以雲名鄉人傳其夢指所生

王文忠公年譜 卷一
樓曰瑞雲樓長而築室越城東南三十里陽明洞讀書故學者稱陽明先生云

九年癸巳二歲

十年甲午三歲

十一年乙未四歲

十二年丙申五歲

先生五歲不言一日與羣兒嬉有神曾過之曰好箇孩兒可惜道破竹軒公悟更今名卽能言

十三年丁酉六歲

十四年戊戌七歲

十五年己亥八歲

十六年庚子九歲

十七年辛丑十歲

是年龍山公舉進士第一甲第一人

十八年壬寅十一歲

龍山公迎養竹軒公因攜先生如京師先生年纔十一翁過金山寺與客酒酣擬賦詩未成先生從傍賦曰金山一
點大如拳打破維揚水底天醉倚妙高臺上月玉簫吹徹
洞龍眠客大驚異

十九年癸卯十二歲

在京師

三十年甲辰十三歲

丁母太夫人鄭氏憂

二十一年乙巳十四歲

居憂

二十二年丙午十五歲

居憂服除 出遊居庸三關卽慨然有經畧四方之志詢
諸夷種落悉聞備禦策逐胡兒騎射胡人不敢犯經月始
返一日夢謁伏波將軍廟賦詩曰卷甲歸來馬伏波早年
兵法鬢毛皤雲埋銅柱雷轟折六字題文尚不磨時畿內
石英王勇盜起又聞秦中石和尙劉千斤作亂屢欲爲書
獻於朝龍山公斥之爲狂乃止

二十三年丁未十六歲

在京師

孝宗宏治元年戊申十七歲

七月親迎夫人諸氏於洪都外舅諸公養和爲江西布政司參議先生就官署委禽合巹之日偶閑行入鐵柱宮遇道士趺坐一榻卽而叩之因聞養生之說逐相與對坐忘

歸

二年己酉十八歲

寓江西十二月以夫人諸氏歸餘姚舟至廣信謁婁一齋諒語宋儒格物之學謂聖人必可學而至遂深契之明年龍山公以外艱歸姚命從弟冕階宮及妹婿牧相與先生講析經義先生日則隨眾課業夜則搜取諸經子史讀

之多至夜分四子見其文字日進嘗愧不及後知之曰彼已游心舉業外矣吾何及也先生接人故和易善謔一日悔之遂端坐省言四子未信先生正色曰吾昔放逸今知過矣自後四子亦漸斂容

閔案婁一齋乃吳聘君高弟公聞學於一齋亦吳氏之流派也

三年庚戌十九歲

四年辛亥二十歲

家居

五年壬子二十一歲

秋舉浙江鄉試是科場中見二巨人各衣緋綠東西立

自言曰三人好作事忽不見其後宸濠之變胡尚書世甯
發其奸孫忠烈燧死其難公平之皆當日同榜所謂好作
事三人也

六年癸丑二十二歲

會試不第

七年甲寅二十三歲

在京師

八年乙卯二十四歲

會試又不第 同舍有以不第爲恥公慰之曰世以不得

第爲恥吾以不得第動心爲恥識者服之 歸餘姚

九年丙辰二十五歲

十年丁巳二十六歲

寓京師 時邊報甚急朝廷推舉將才公念武科之設僅得騎射勇士之士不可以收勗畧統馭之才於是兵家秘書無不精究或賓宴則聚果核列陣爲戲

十一年戊午二十七歲

十二年己未二十八歲

會試舉南宮第二人賜二甲進士出身第七人觀政工部未第時嘗夢威甯伯遺以弓劍是秋欽差督造威甯伯王越墳馭役夫以什伍法休食以時暇卽驅演八陣圖事竣威甯家以金帛謝不受乃出威甯所佩寶劍爲贈適與

夢符遂受之時有星變朝廷下詔求言及聞達虜猾獵公復命上邊務八事言極剴切

十三年庚申二十九歲

授刑部雲南清吏司主事

十四年辛酉三十歲

奉命審錄江北 公錄囚多所平反事竣遂遊九華作遊
九華賦宿無相化城諸寺

十五年壬戌三十一歲

官京師 一日歎曰吾安能以有限精神爲無用之虛文
耶遂告病歸越築室陽明洞中靜久思離此遠去惟祖母
岑與龍山公在念因循未決久之又忽悟曰此念生於孩

提此念可去是斷滅種性矣

十六年癸亥三十二歲

是年移疾錢塘西湖復思用世往來南屏虎跑諸刹有禪僧坐關三年不語不視先生喝之曰這和尚終日口巴巴說甚麼終日眼睜睜看甚麼僧驚起卽開視對語先生問其家對曰有母在曰起念否對曰不能不起先生卽指愛親本性諭之僧涕泣謝明日問之僧已去矣

十七年甲子三十三歲

秋主考山東鄉試 巡按山東監察御史陸偁聘主鄉試試錄出公手筆人占公經世之學

九月改兵部武選清吏司主事

十八年乙丑三十四歲

官京師是年與甘泉湛若水定交以倡明聖學爲事

武宗正德元年丙寅三十五歲

官京師 是時武宗初政奄羈竊柄南京科道戴銑薄彥
徽等以諫忤旨逮繫詔獄先生首抗疏救之其言君仁臣
直銑等以言爲責其言如善自宜嘉納如其未善亦宜包
容以開忠讜之路乃今赫然下令遠事拘囚在陛下不過
少示懲創非有意怒絕之也下民無知妄生疑懼臣切惜
之自是而後雖有上關宗社危疑不測之事陛下孰從而
聞之陛下聰明超絕苟念及此甯不寒心伏願追收前旨
使銑等仍舊供職擴大公無我之仁明改過不吝之勇聖

德昭布遠邇人民胥悅豈不休哉疏入亦下詔獄已而廷杖四十既絕復甦尋謫貴州龍場驛驛丞

二年丁卯三十六歲

夏赴謫至錢塘瑾遣人隨僨公度不免乃託言投江以脫之因附商船遊舟山偶遇颶風大作一日夜至閩界比登岸奔山徑數十里夜叩一寺求宿僧故不納趨野廟倚香案卧蓋虎穴也夜半虎遠廊大吼不敢入黎明僧意必斃於虎將收其囊見公方熟睡呼始醒驚曰公非常人也不然得無恙乎邀至寺寺有異人嘗識於鐵柱宮約二十年相見海上至是出詩有二十年前曾見君今來消息我先聞之句與論出處且將遠遁其人曰汝有親在萬一瑾怒

逮爾父誣以北走湖南走粵何以應之因爲著得明夷遂
決策返公題詩壁間曰險夷原不滯胸中何異浮雲過太
空夜靜海濤三萬里月明飛錫下天風因取間道由武夷
而歸時龍山公南京吏部尙書從鄱陽往省十二月返錢
塘赴龍場驛 徐愛公妹婿也是年從學

三年戊辰三十七歲

春至龍場 龍場在貴州西北萬山叢棘中蛇虺魍魎蟲
毒瘴癘與居夷人歎舌難語可通語者皆中土亡命舊無
居始教之範土架木以居時瑾憾未已自計得失榮辱皆
能超脫惟生死一念尚覺未化乃爲石墳自誓曰吾惟俟
命而已日夜端居澄默以求靜一久之胸中灑灑而從者